

PROPIS OBILJEŽAVANJA
MEVLUDA

محمد
عليه
السلام

Imam Abdul-Aziz b. Abdullah b. Baz, rhm.

naslov poslanice:

PROPIS OBILJEŽAVANJA MEVLUDA

Imam Abdul-Aziz b. Abdullah b. Baz, rhm.

prijevod: Amir I. Smajić



DRUGO IZDANJE

Medina, 1436 / 2015.

U ime Allāha, Svemilosnog, Milostivog!

Zahvala pripada Allāhu i neka su *salavāti* i *selāmi* na Allāhovog Poslanika, njegovu časnu porodicu, ashabe i sve one koji budu slijedili njegovu uputu.

U zadnje vrijeme povećao se broj onih koji pitaju o propisu obilježavanja *mevluda*¹ Muhammeda, sallallāhu alejhi ve sellem, i ustajanja njemu na noge pri donošenju *salavāta* i *selāma*, te drugih djela koja su popratna obilježavanju *mevluda*.

Kao odgovor na to, kažem da nije dozvoljeno obilježavanje Poslanikovog, sallallāhu alejhi ve sellem, rođendana, niti rođendana bilo koje druge osobe, jer se to ubraja u novotarije koje su naknadno uvedene i pripisane vjeri.

Sam Allāhov Poslanik, sallallahu alejhi ve sellem, nije obilježavao *mevlud*, niti su to radile njegove pravedne *halife*², niti iko drugi od ashaba Allahovog Poslanika, sallallahu alejhi ve sellem, radijallāhu

¹ Tj. njegovog, sallallāhu alejhi ve sellem, rođendana kojeg neuki narod obilježava 12. *rebi'ul-evvela* svake hidžretske godine.

² Tj. Ebū Bekr, Omer b. El-Hattāb, Osman b. Affān i Alija b. Ebi Tālib, radijallahu anhum, koji se smatraju najboljim ashabima.

anhum. Također, to nije radio niko od onih koji su došli poslije ashāba među tri ispravne i odabrane generacije (*selefu-salih*). Oni su najbolje poznavali *sunnat*³ Allāhovog Poslanika, sallallāhu alejhi ve sellem, više su ga volili i potpunije slijedili njegov plemeniti *sunnat* od svih onih koji su došli nakon njih.

Vjerodostojnim lancem prenosilaca zabilježeno je od Allāhovog Vjerovjesnika, sallallāhu alejhi ve sellem, da je rekao: "***Ko u ovu našu vjeru uvede ono što nije od nje, neće mu biti primljeno.***"⁴, tj. biće odbačeno.

I rekao je, sallallāhu alejhi ve sellem, u drugom hadisu: "***Oporučujem vam moj sunnat i sunnat mojih pravednih halifa nakon mene. Čvrsto se prihvatite toga i stisnite svojim kutnjacima. I upozoravam vas na novine u vjeri, jer svaka novina u vjeri je bid'at – novotarija, a svaka novotarija je zabluda.***"⁵

U prethodna dva hadisa žestoko je zapriječeno i upozoreno na opasnost uvođenja i rađenja novotarija.

³ Tj. njegove riječi, djela, uputu, svojstva, osobine i dr.

⁴ Buhāri, br. 2697, Muslim, br. 1718, od Aiše, radijallāhu anha.

⁵ Ahmed, 4/126-127, Ebū Davūd, br. 4607, Tirmizi, br. 2676, Ibn Mādže, br. 44, Ibn Hibbān, br. 5 i drugi, od Irbāda b. Sārije, radijallāhu anhu. Hadis je vjerodostojan kao što su rekli Tirmizi, Ebū Nu'ajm, Hākim, Ibn Abdil-Berr, Begavi, Ibn Tejmijje, Zehebi, Ibn Redžeb i mnogi dr. Vidi: *Džāmi'ul-ulūmi vel-hikem*, str. 486-487.

Allāh, azze ve dželle, rekao je u Svojoj Jasnoj knjizi: *"... a ono što vam Poslanik dadne to uzmite, a što vam zabrani to ostavite."*⁶

*"Neka se pripaze oni koji postupaju suprotno njegovom naređenju da ih ne pogodi kakva fitna (smutnja) ili da ih ne zadesi bolna kazna."*⁷

*"Vi u Allāhovom Poslaniku imate najbolji uzor, za onoga koji se nada Allāhovoju milosti i nagradi na onom svijetu, i koji često Allāha spominje."*⁸

*"Allāh je zadovoljan prvim muslimānima, muhā-džirima i ensārijama i svima onima koji ih slijede dobra djela čineći, a i oni su zadovoljni Njime; za njih je On pripremio džennetske bašče kroz koje rijeke teku, i oni će vječno i zauvijek u njima boraviti. To je veliki uspjeh."*⁹

*"Danas sam vašu vjeru usavršio i Svoju blagodat prema vama upotpunio i zadovoljan sam da vam Islām bude vjera."*¹⁰

Ājeti koji govore o ovome su mnogobrojni.

⁶ Prijevod značenja, *El-Hašr*, 7.

⁷ Prijevod značenja, *En-Nūr*, 63.

⁸ Prijevod značenja, *El-Ahzāb*, 21.

⁹ Prijevod značenja, *Et-Tevbe*, 100.

¹⁰ Prijevod značenja, *El-Māide*, 3.

Oni koji obilježavaju *mevlud*, i njemu slične običaje, kao da žele reći da Uzvišeni Allāh nije usavršio i upotpunio vjeru ovom ummetu, te da Allāhov Poslanik, sallallāhu alejhi ve sellem, nije dostavio ummetu ono što im je potrebno da rade po tome, sve dok nisu došli oni nakon njega pa uveli u vjeru ono što Allāh nije dozvolio, misleći da je to od djela koja ih približavaju Allāhu. U spomenutom se, bez sumnje, nalazi velika opasnost i nepokornost Allāhu i Njegovom Poslaniku, sallallāhu alejhi ve sellem.

Uzvišeni Allāh je Svojim robovima usavršio vjeru i upotpunio prema njima Svoju blagodat, a Poslanik, sallallāhu alejhi ve sellem, dostavio je i prenijeo do nas vjeru jasno i u potpunosti je pojasnio, te nije ostavio ni jedan put koji nas vodi ka Džennetu i udaljava od Vatre a da nam ga nije pojasnio i uputio nas na njega.

Abdullāh b. Amr, radijallāhu anhuma, u vjerodostojnom hadisu prenosi od Allāhovog Poslanika, sallallāhu alejhi ve sellem, da je rekao: ***"Nije Allāh poslao nijednog vjerovjesnika a da nije imao za obavezu da uputi svoj ummet na ono što je poznavao od dobra za njih i upozori ih na ono što je poznavao od zla po njih."*** Hadis je zabilježio Muslim u *Sahihu*.¹¹

¹¹ *Sahih Muslim*, br. 1844.

Svima je poznato da je naš Poslanik, sallallāhu alejhi ve sellem, najbolji od svih poslanika i pečat svih vjerovijesnika. On je najpotpuniji od svih ljudi u prenošenju objave od Allāha i najbrižniji u upućivanju savjeta. S tim u vezi, da je obilježavanje mevluda od vjere s kojom je Allāh zadovoljan za Svoga Poslanika, sallallāhu alejhi ve sellem, i njegov ummet, zasigurno bi ga obilježio i sam Allāhov Poslanik, sallallāhu alejhi ve sellem, za vrijeme svog života, ili bi to uradio barem neko od njegovih ashāba - Allāh bio sa njima zadovoljan. Kada znamo da se to nije desilo, onda nam je jasno da je islām od toga čist. Nasuprot, to je od novotarija u vjeri na koje je Allāhov Poslanik, sallallāhu alejhi ve sellem, upozorio svoj ummet, kao što je spomenuto u prethodna dva hadisa, a isto značenje preneseno je i u drugim hadisima.

Od tih hadisa su njegove, sallallāhu alejhi ve sellem, riječi na džumanskoj hutbi: ***"... a zatim, doista je najbolji govor – Allāhova knjiga, a najbolja uputa – uputa Muhammeda, sallallāhu alejhi ve sellem, a najgore stvari su novine u vjeri, a svaka novotarija (bid'at) je zabluda."*** Hadis je zabilježio Muslim u *Sahihu*.¹²

Ājeta i hadisa koji govore o tome ima mnogo.

¹² *Sahih Muslim*, br. 867, od Džābira b. Abdullāha, radijallāhu anhumā.

Velika skupina islāmskih učenjaka jasno je porekla dozvoljenost i ispravnost obilježavanja *mevluda*, te upozorila na njega, uzimajući za dokaz spomenute i druge argumente. Drugi od kasnijih učenjaka imali su oprečan stav njima i dozvolili *mevlud* ako se u njemu ne čini nešto od vjerom pokuđenih i prezrenih radnji, kao pretjerivanje u veličanju Allāhovog Poslanika, sallallāhu alejhi ve sellem, miješanja između muškaraca i žena, korištenja muzičkih instrumenata za razonodu i zabavu i drugih radnji i djela pokuđenih šerijatom, koji je naravno čist od svega toga. Neki su čak ubijedeni da se *mevlud* smatra lijepom novotarijom.¹³

Međutim, šerijatsko pravilo nalaže da se sve ono oko čega se ljudi razilaze od vjerskih propisa vrati Allāhovoj knjizi i sunnetu Allāhovog Poslanika, sallallāhu alejhi ve sellem.

Uzvišeni je rekao: *"O vjernici, pokoravajte se Allāhu i pokoravajte se Poslaniku i vašim predvodnicima. A ako se u nečemu razidete, vratite se Allāhu i Poslaniku, ako vjerujete u Allāha i Sudnji dan; to vam je bolje i za vas rješenje ljepše."*¹⁴, *"Ma u čemu se razilazili, treba da presudu da Allāh."*¹⁵

¹³ Ar. *el-bid'atul-hasene*.

¹⁴ Prijevod značenja, *En-Nisa*, 59.

¹⁵ Prijevod značenja, *Eš-Šūra*, 10.

Mi smo se, da bi saznali propis *mevluda*, vratili Allāhovoј knjizi, pa smo našli da nam naređuje slijedenje Poslanika, sallallāhu alejhi ve sellem, u svemu s čime je došao od vjerskih propisa i na što nas je upozorio od zabranjenih stvari, a ujedno nas je, dželle šanuh, obavjestio da je usavršio ovom ummetu njihovu vjeru. U isto vrijeme, znamo da nam Allāhov Poslanik, sallallāhu alejhi ve sellem, nije propisao obilježavanje *mevluda*, pa s tim u vezi nam biva jasno da *mevlud* nije od vjere koju nam je usavršio Uzvišeni Allāh.

Uzvišeni nam je, također, naredio slijedenje Allāhovog Poslanika, sallallāhu alejhi ve sellem, u vjeri, pa mi smo vratili propis *mevluda* njegovom sunnetu, i nismo našli ni u njemu da je obilježavao *mevlud*, niti da je naredio ili preporučio njegovo obilježavanje, niti su ga obilježavali njegovi plemeniti ashābi - Allāh bio sa njima zadovoljan.

Iz prethodnog smo zaključili da *mevlud* nije od vjerom propisanih djela, nego se ubraja u novotarije koje su uvedene u vjeru naknadno i smatra zabranjenim oponašanjem *ehlul-kitabija*, židova i kršćana, prilikom njihovih praznika.

Jasno je svakom - ko ima i trun pronicljivosti i žudi za slijedenjem istine a u tome je pravedan - da obilježavanje *mevluda* nije od vjere islāma, nego je uvedena novotarija koju su nam Allāh i Njegov

Poslanik, sallallāhu alejhi ve sellem, naredili da napustimo.

Ne dolikuje onom ko ima razuma da bude slijepo zaveden mnoštvom onih koji obilježavaju *mevlud* širom dunjaluka, jer se istina ne prepoznaje po mnoštvu sljedbenika, nego po šerijatskim argumentima. Uzvišeni Allāh u kontekstu židova i kršćana ističe: ***"Oni govore da neće ući u Džennet osim ko bude od židova ili kršćana. To su puste želje njihove! Ti reci: Dokaz svoj dajte ako je istina to što govorite."***¹⁶, ***"Ako bi se ti pokoravao većini onih koji žive na Zemlji; oni bi te od Allāhova puta odvratili."***¹⁷

Zatim, obilježavanje *mevluda* u večni slučajeva, pored toga što je novotarija, nije pošteđeno i drugih prezrenih i zabranjenih radnji, poput miješanja između muškaraca i žena, slušanja muzike i pjesmi, pijenja opojnih pića i konzumiranja onoga što muti pamet¹⁸ i drugih sličnih zlih pojava.

Nekad se desi i nešto mnogo opasnije od navedenog, a to je činjenje velikog širka. Primjer toga je pretjerivanje u veličanju Allāhovog Poslanika, sall-

¹⁶ Prijevod značenja, *El-Bekare*, 111.

¹⁷ Prijevod značenja, *El-En'am*, 10.

¹⁸ Ovo za sada, hvala Allahu, nije prisutno u našim krajevima, ali je rašireno u mnogim muslimanskim zemljama.

allāhu alejhi ve sellem, ili drugih od tzv. *Evlja* i sl. On, sallallāhu alejhi ve sellem, biva dozivan i upućuju mu se dove, traži se od njega pomoć, vjeruje se da on poznaje nevidljivi svijet (gajb) i ono što će se desiti u budućnosti, te i druga djela koja su jasno nevjerstvo. Mnogi ljudi ih čine prilikom obilježavanja *mevluda* posvećenog Allāhovom Poslaniku, sallallāhu alejhi ve sellem, ili nekom drugom od onih koje oni nazivaju Allāhovim *evlijama*.

Vjerodostojno je preneseno od Allāhovog Vjerovjesnika, sallallāhu alejhi ve sellem, da je rekao: ***"Upozoravam vas na pretjerivanje u vjeri, jer je, doista, pretjerivanje u vjeri uništilo one koji su bili prije vas."***¹⁹

I rekao je, sallallāhu alejhi ve sellem: ***"Nemojte pretjerivati spram mene kao što su pretjerali kršćani spram sina Merjeminog. Doista, ja sam rob, pa zato recite: 'Allāhov rob i Njegov poslanik!'"*** Hadis je zabilježio imam Buhāri u *Sahihu* od Omera, radijallāhu anhu.²⁰

Zaista je čudno da mnogi ljudi ulažu krajnji napor i trud kako bi prisustvovali obilježavanju *mevluda*, iako je novotarija, i žestoko to opravdavaju, ali u isto

¹⁹ Ahmed, br. 3247, Nesai, br. 3087, Ibn Mādže, br. 3029 i dr. od Ibn Abbāsa, radijallāhu anhumā.

²⁰ *Sahihul-Buhāri*, br. 3445.

vrijeme napuštaju ono što im je Allāh, dželle šanuh, naredio, poput obavljanja džuma-namaza i ostalih namaza u džematu.²¹ Na ta izrazito bitna djela ne obraćaju pažnju niti smatraju da su grješni radi toga. Razlog tome je, bez imalo sumnje, slabosti imāna (vjerovanja), nedovoljna upućenost i mnoštvo grijeha koji su prekrili njihova srca, Allāh oprostio i nama i svim drugim muslimānima.

Neki među onima koji odlaze na *mevlude* misle da Allāhov Poslanik, sallallāhu alejhi ve sellem, lično prisustvuje obilježavanju *mevluda*, pa radi toga mu - želeći ukazati počasti i izraziti dobrodošlicu - ustaju na noge. Ovo je od najpokvarenijih izmišljotina i vrhunac neznanja. Allāhov Poslanik, sallallāhu alejhi ve sellem, neće izaći iz svog kabura prije Sudnjega dana, niti ima ikakvog kontakta sa bilo kim od ljudi, niti prisustvuje njihovim okupljanjima, nego boravi u svome kaburu (mezaru) do Sudnjega dana, a njegova duša je na uzvišenom skupu²² kod svoga Gospodara, u Kući plemenitosti.

²¹ Mnogi uopšte ne obavljaju namaz, niti išta od islāmskih ruknova i šartova, a onda odlaze na *mevlud* želeći time da iskažu svoju ljubav prema Allāhu i Njegovom Poslaniku, sallallāhu alejhi ve sellem, što je očita kontradiktornost, da nas Uzvišeni Allāh sačuva zablude.

²² Tj. s melecima bliskim Uzvišenom Allāhu, azze ve dželle.

Uzvišeni Allah rekao je u suri *El-Mu'minun*: "***Vi ćete, poslije toga, pomrijeti, a zatim ćete, na onom svijetu, oživljeni biti.***"²³

A Allāhov Poslanik, sallallāhu alejhi ve sellem, kaže: "***Ja sam prvi čiji će se kabur otvoriti na Sudnjem danu, i prvi koji će se zauzimanti (činiti šefa'at), i prvi čije će zauzimanje biti primljeno.***"²⁴ - neka je na njega najbolji *salavāt* i *selām* od svoga Gospodara.

Ovaj plemeniti ājet i hadis, te svi drugi ājeti i hadisi identičnog značenja, upućuju da će Allāhov Vjervjesnik, sallallāhu alejhi ve sellem, a i drugi mrtvaci, biti proživljeni iz kaburova tek na Sudnjem danu. Oko toga su jednoglasni svi islāmski učenjaci i niko od njih ne suprostavlja se tome.

Svaki muslimān dužan je povesti brigu o ovim stvarima i pripaziti se novotarija koje su neznalice nepravedno uvele u vjeru, a o čemu Uzvišeni Allāh nije spustio ikakva dokaza, a Allāh je najbolji pomagač, na Njega se istinski oslanjamo, i nema promjene stanja niti snage osim uz Allāhovu pomoć.

Kada je posrijedi nazivanje *selāma* Allāh ovom Poslaniku, sallallāhu alejhi ve sellem, mimo *mevluda*,

²³ Prijevod značenja, *El-Mu'minūn*, 15-16.

²⁴ Muslim, br. 2278, od Ebū Hurejre, radijallāhu anhu.

to je dobro djelo i smatra se od najboljih pokornosti koje nas približavaju Allāhu.

Uzvišeni je rekao: *"Doista Allāh i meleki Njegovi donose salavāt na Vjerovjesnika. O vjernici, donosite salavāt na njega i vi, i pokorite se u potpunosti!"*²⁵, a Allāhov Poslanik, sallallāhu alejhi ve sellem, ističe: *"Ko na mene donese jedan salavāt, Allāh na njega donese deset."*²⁶

Donošenje *salavāta* je propisano u bilo koje vrijeme, a posebno je pritrđeno na kraju svakog namaza²⁷, čak i obavezno (vadžib) kod nekih islamskih pravnika.

Sunnetom pritrđeno donositi *salavāt* u mnogim situacijama, kao nakon ezāna, prilikom njegovog, sallallāhu alejhi ve sellem, spomena, u danu i noći džume (petka), kao što na to upućuju mnogi hadisi.

Allāha molimo da nas, a i sve ostale muslimane, uputi na ispravno razumijevanje vjere, da nas učvrsti na njenom slijeđenju, da nas sve počasti slijeđenjem Sunneta i napuštanjem novotarija, doista je On Blagi i Plemeniti.

²⁵ Prijevod značenja, *El-Ahzāb*, 56.

²⁶ Muslim, br. 384, od Abdullāha b. Amra, radijallāhu anhumā.

²⁷ Tj. na zadnjem sjedenju – *tešehhudu*.

Neka je Allāhov *salavāt* i *selām* na našeg vjerovjesnika Muhammeda, njegovu časnu porodicu i sve plemenite ashabe.²⁸

²⁸ Ova kratka poslanica štampana je više puta od strane Saudijskog muftijstva i Ministarstva za islamska pitanja i vakufe, a naknadno je po dozvoli uvaženog šejha, Allāh mu se smilovao, uvrštena u njegove sabrane fetve, članke i poslanice *Medžmū'a fetava ve mekālāt mutenevi'a*, ili poznatije kao *Medžmū'a fetāvā Ibn Bāz*, 1. tom, str. 178-182.



BESPLATAN PRIMJERAK